

是故我今者 見有捨錢者

生於希有想 歎言難可作

不見有弓刀 強逼大王者

亦無有畏忌 開意捨難捨

苦求乃得錢 是故我今日

見有捨財者 心生未曾有

我自見其證 極苦不肯捨

大王今當知 慳心難可捨

(四〇) 復次善觀察所作當時雖有過後必有大益。我昔曾聞。有一比丘常被盜賊。一日之中堅閉門戶。賊復來至扣門而喚。比丘答言。我見汝時極大驚怖。汝可內手於彼向中。當與汝物。賊即內手置於向中。比丘以繩繫之於柱。比丘執杖開門打之。打一下已語言。歸依佛。賊以畏故即便隨語歸依於佛。復打二下語言歸依法。賊畏死故復言歸依法。第三打時復語之

言。歸依僧。賊時畏故言歸依僧。即自思惟。

今此道人有幾歸依。若多有者必更不見此閻浮提。必當命終。爾時比丘即放令去。以被打故

身體疼痛久而得起。即求出家。有人問言。汝先作賊造諸惡行。以何事故出家修道。答彼人

言。我亦觀察佛法之利然後出家。我於今日遇善知識。以杖打我三下。唯有少許命在不絕。

如來世尊實一切智者。若教弟子四歸依者我命即絕。佛或遠見斯事故出比丘打賊三下。使我

不死。是故世尊唯說三歸不說四歸。佛愍我故說三歸依不說四歸。即說偈言

決定一切智 以憐愍我故

是以說三歸 不說有第四

為於三有故 而說三歸依

若當第四者 我則無歸依

我今可憐愍 身命於彼盡

我見佛世尊 遠觀如斯事
生於未曾有 是故捨賊心
有因麤事解 或因細事悟
麤者悟麤事 細者解細事
由我心麤故 因麤事解悟
我解斯事故 是以求出家

大莊嚴論經卷第六